

文谷集二

詩

~16
2431
2



和
2431
13-2

文谷集卷之三目錄

詩 一百九十三首

病中遣悶錄呈無何堂

復疊前韻呈無何堂

贈別北評事洪國卿 二首


南叅判 老星 挽

春帖

解銓長志喜

沂川洪相國挽

十月初六日夜夢作



銅雀江上送同春南歸

登統軍亭

謹次伯氏寄贈韻 二首

松都次雲卿三疊前韻贈別之作

瑞興途中

黃州會伯氏別後謹次前日寄示韻 二首

謹次伯氏濠上亭韻

龍灣感懷

登百祥樓集句 二首

秋夕途中感懷

謁箕子墓

武烈祠

八月十八日追悼亡兒

感舊書贈印海上人

次韻奉贈松都留相洪丈子晦

曹叅判 漢英 挽

仲氏將赴江都感懷書呈

松谷趙尚書挽

朴主簿振禧挽

徐判書 必遠 挽

祇役 寧陵曉起感懷

宿石室書院

寄松都經歷洪國寶

永安尉挽

閔判書

維重

夫人挽

朴司諫晦仲挽

二首

祇役

顯陵錄奉金永叔李長卿

寧陵志感疊前韻

別長卿奉使北關

諸陵

削職歸磻溪贈別朴大興仲八

明村酒席錄奉仲八

李洪州

暹

挽

溪舍詠懷次朴思菴韻

別羅弟仲輔之湖西仍省其表叔於茂朱

觀音寺僧詩軸次白軒韻

南雲卿訪溪舍翌日有詩追寄次韻

西郊拜別伯氏松讓之行

三首

豐壤途中望靈芝洞有感

向洞陰曉發

光陵

白雲山留贈金君聲大

寧陵遷葬挽詞 三首

宋原州 時詰挽

燕行時集兒隨到箕城辭歸書贈 二首

和俞伯圭寄別韻

將渡鴨江謹次伯氏韻 三首

寄人

通遠堡

遼陽客夜書懷

牛庄寄示兒輩

山海關夜夢與幼能相見書一絕以志之

獨樂寺

元日

春雪

感舊

山海關

中前所記事

杏山曉發

十三山途中

廣寧

自盤山抵沙嶺

三义河

遼陽

仁宣王后挽詞

又代述 二首

南判書雲卿母夫人挽

顯宗大王挽詞 三首

仁宣王后練暮入城叅哭班曉還途中口占

江上夜望

祇役 寧陵歸路與李樂甫羅顯道會晤書示

次韻寄遼陽李之淮 二首

應 旨進言 天怒大震初 命付處原州行

到楊山聞改 命遠竄轉向南路口占

公山途中

族子盛最以金吾郎押余行到靈巖還歸臨別

協兒偶吟謫仙詩句足成以贈

漫吟

月夜次柳子厚登城樓韻

頭流聰上人見訪謫居投贈一詩依韻草贈

敬次尤齋寄示韻

鄭直長涖來訪以菊花酒見餉

用東坡夜坐與邁聯句韻與兒輩聯句

協也還洛用兒輩韻書贈

敬次伯氏過宿鷹巖感懷韻

又集句錄呈

寄李喜朝

昔蘇長公謫黃州劉元城竄嶺表年皆四十七

今余遷謫之年亦與相符漫書以志之

悼天

二首

追次協兒除夕韻

答李長卿用余荒字韻見寄

答李弼卿用荒字韻見寄

李長卿到南原以三律見寄次韻以答

三首

次韻述悼天之懷寄朴仲八

翁兒挈其婦子北歸口占韻語以贈

敬次仲氏寄示韻

二首

敬次仲氏與李弼卿酬唱韻

病中遣悶

二首

次韻寄謝弼卿

三首

三月望日卽事

謝洪國卿用先祖韻見寄

次韻寄答李甥濡 二首

李生儀朝來過感懷書贈

青巖鄭督郵治來過書贈

送春後一日復疊前韻

四月初六日即事

漫詠

四月初九日書懷

協兒遊石門而還有詩次韻

五月初四日志感

端陽感懷

端陽即事

見伯氏書感懷寄呈

哭綾豐府院君

晝眠

六月初十日即事

睡起

夜雨

敬次仲氏下示二律韻 二首

次協兒途中寄來韻 三首

先王祥日志感

敬次伯氏籠水亭韻

重陽漫吟一絕

月夜集句

哭尹晉州

衡聖

二首

秋懷

八首

敬次伯氏寄示韻

十月初五日曉夢拜

孝廟

朴和叔用其先王父韻見寄次韻

二首

敬次伯氏韻

夜景

敬次伯氏次陸放翁韻

又用前韻寄懷

次臨瀛府伯李弼卿寄伯氏韻

次李甥世白見寄韻

次韻寄題金德耆肯構堂

又次前韻寓懷並寄

朗州冠緝兒聊述韻語書示

送翁緝二兒上洛翌日有作

不眠

寒甚

訪孤山寺留題示居僧

宿道岬寺醉後書示鳩林諸人

道岬寺書贈法閒上人

還自月出次柳柳州登西山韻

夜坐

記事

次崔內翰

錫鬲 見寄韻 二首

臘月二十三日曉夢與同春尤齋相會口占

臘月二十三日大風雨徹夜

二首

除夕書感

文谷集卷之三

詩一百九十三首

病中遣悶錄呈無何堂

丁未

佳辰臥病杏花初落盡桃花病未蘇
虛聽酒槽垂夜滴任教賓院長春蕪
消磨習氣拋詩卷寂寞生涯付藥爐
唯有向來豪興在夢隨鷗鷺浴江湖

復疊前韻呈無何堂

高情半世不渝初幾許西園著醉蘇
偏荷酒筵常繾綣自慚詩律足繁蕪
頻留夏簟傾冰椀共賞寒梅擁獸爐
酬詠只今還有感座中無復對青湖



贈別北評事洪國卿 柱國

磨天嶺對白山高，俯壓東溟萬里濤。
君向此中聊騁望，世間榮辱一秋毫。

其二

送君重憶北行時，絕塞辛艱到自知。
臨別不須勤索句，驛亭隨處有吾詩。

南叅判 老星 挽

清風洞府絕塵紛，一半青山宅相分。
移竹時花消暇日，結茅為屋伴閒雲。
園林勝賞難重見，麈尾高談可復聞。
春信欲迴人事變，落梅依舊點苔紋。

春帖 戊申

新年何事動新歡，聖主恩深許解官。
從此百年閒自放，盤溪烟水一漁竿。

解銓長志喜

脫却銓衡趁早春，聖恩如海到微臣。
閒門正好堪羅雀，多事當年大署人。

沂川洪相國挽

清規自作士林宗，賤子偏蒙德宇容。
文靖廳前纔旋馬，李膺門下即登龍。
分明病枕承餘論，奄忽朝堂闕舊蹤。
時事漸艱耆舊盡，晚途孤絕欲何從。

十月初六日夜夢作

羸驂獨出上東門未老歸田荷 聖恩一壑千峰雲

水外向來車馬不聞喧

第二句覺後足成

銅雀江上送同春南歸舟中口占奉贈

庚戌

江頭曾詠白駒詩聚散悲歡歲幾移今日一樽相送處可堪非復別離時

登統軍亭

江流萬折赴滄溟鵲岫依然一點青北望中原無限感斜陽獨倚統軍亭

謹次伯氏寄贈韻

彭澤寧論東帶羞百年天地萬端愁雲山水石同歸計自笑如今揔謬悠

其二

相逢無語只含羞客裏仍成去住愁山館月明秋氣動白雲歸思轉悠悠

松都次雲卿三疊前韻贈別之作

別袖去難挽西風吹不休自多中歲感非復少年遊立馬荒臺夕棲鴉古堞秋明朝過江路誰與共仙舟

瑞興途中

客路穿荒峽行行秋日斜林深多虎跡地瘠少人家

水岸棠梨樹山田木麥花羈愁正搖落何處駐征車

黃州拜會伯氏別後謹次前日寄示韻追呈

鴿原別恨又秋天幾度看雲白日眠千載二蘇聞雨
意黃岡今夕共團圓

其二

歧路居然別淚滋弱腸隨處易生悲相看各被浮名
誤歲晚歸田計又非

謹次伯氏濠上亭韻

秋來病客尚征途日送冥鴻愧不如霜落塞門佳節
近水鄉歸興憶鱸魚

龍灣感懷

行窮絕域暫停轅却筭歸程更斷魂江到九龍秋水
瀾山橫白馬朔雲屯邊城暮雨遙連海客舍寒燈早
閉門何處感懷偏掩淚統軍亭下壽星村

登百祥樓用唐詩集句

迢遞高城百尺樓暮天新鴈起汀洲經過此地無窮
事人自傷心水自流

其二

上盡重城更上樓蕭疎楊柳隔沙洲千年事往人何
在檻外長江空自流

秋夕途中感懷

霜露丘原節序新自憐關塞未歸身
蕭蕭暮雨秋山路客裏多逢上塚人

謁箕子墓

盛化能將夏變夷千秋東土揭民彝
伊川被髮還今日俯仰乾坤一涕洟

武烈祠

石星李如松李如柏
楊元張世爵並享

再造恩深沒世思皇家將相我東私
尚書籌策江河決都督威名草木知
颯爽風神餘舊像淒涼香火尚遺祠
紛紛冠蓋門前路地覆天翻萬事悲

八月十八日追悼亡兒

汝生六歲短我慟千古長森然玉雪姿
宛宛何日忘時來入我夢聊以慰悲傷
只今夢亦疎精靈豈微茫空山一杯土
宿草日荒涼暗泉咽哀壑悲風啼白楊
孤魂耿無依幾回望爺孃我行遠出塞
汝母病在床今辰飯一盤誰復奠汝傍
瞻彼林間烏子母必相將人事何錯迕
我存汝則亡無由繞墳號南望摧寸腸

感舊書贈印海上人

客到雲居寺鐘鳴日暮時瀑泉雷怒吼
霜葉錦離披宿約僧猶記浮生我已衰
紗籠太多事偏愧舊題詩

次韻奉贈松都留相洪文子晦 處亮

先朝往事夢依依前席餘香尚在衣獻吉悲歌中夜
泣貞元供奉舊人稀荒城坐對寒鴉噪絕塞行隨旅
鴈歸摠為浮名成潦倒一秋幽興負山扉

曹叅判 漢英挽

雪窖當年事追思只泫然詩篇尚傳誦世故幾推遷
此老仍黃壤殘生亦白顛傷心浦東路飛旄逐歸船
仲氏將赴江都感懷書呈

梁山泣血閱三霜子子相依只鴈行險路久知同灑
灑餘生更耐各參商江都別夢風濤隔海郡歸期歲

月長好趁新春尋舊約南溪東郭共徜徉

松谷趙尚書挽 辛亥

才局詞華不乏人掇皮誰復似公真平生孝友承家
訓一節忠勤報國身蔀屋悲號良喪父胃筵誠懇
主知臣傳心大硯渾如昨撫跡那堪愴後塵

朴主簿振禧挽 以痘醫各

朱門白屋視還均起死回生術亦仁捐麥脫驂今不
見向來何限受恩人

徐判書 必遠挽

朝端早許出羣才自信平生任衆咭江漢寧論千里

曲丘山不受萬牛回功名摠入槐安夢殄瘁偏驚木
稼災銓省舊僚今白髮可堪陳跡隔泉臺

祇役

寧陵曉起感懷錄奉宗伯鄭谷口

知和

族丈

壬子

松檜陰陰閼閣深子規啼罷月西沈孤臣十載攀髯
慟每到橋山淚不禁

乞暇省墓宿石室書院

霜落汀洲候鴈哀客窻清迥夢初回孤村夜火金臺
近百里秋濤斗峽來地勝便生遺世念時危還愧濟
川才江湖廊廟無長策歲暮偏驚白髮催

寄松都經歷洪國寶

世故相仍秋又廻重遊孤負泛槎臺萬山紅葉千尋
瀑空遣龍眠畫取來

永安尉挽

行看世路轉艱難蟬蛻知公適去安福祿爭推今古
罕身名贏得始終完良朋沂相攜初老羣從湖翁並
靜觀榮辱是非輸一夢好從泉下更追歡

閔判書

維重

夫人挽

歸寧宿計指深冬湖外書傳病裏封誰謂婺星先晦
彩更堪天柱遽摧峰床頭女史皆庭訓架上朝衣摠

手縫滿室呱呱兒索乳安仁心事欲何從

朴司諫晦仲挽 癸丑

呼燈驚起倒裳衣乞藥賢郎曉欵扉誰謂夕言猶未
了奄看朝露已先晞封依羸博違先兆慟結門閭待
晚歸風味更從何處挹屋梁殘月夢依稀

其二

公餘嶽寺陟崎嶇蠟屐高秋四子俱浮世幾年重涕
淚舊遊今日半泉塗逢迎意氣誰青眼潦倒形骸自
白鬚門掩北隣還往斷蔣家三徑草全蕪 曾於癸卯
秋陪仲

氏與晦仲子輝同訪僧伽寺
子輝歿已九年今晦仲又逝

祇役 顯陵錄奉同行大學士金永叔 萬基 小

宗伯李長卿求和

汨沒終何事聯翩偶此行年華雙鬢變交誼寸心明
細草侵殘燒幽禽哢晚晴鄉山只在眼轉切未歸情

次韻

永叔

德宇瞻依久追陪又此行忽投春日詠驚覩夜珠
明淑氣新回暖柔條已弄晴歸田雖有願勵翼慰
羣情

寧陵志感疊前韻奉長卿永叔

每憶喬山路曾隨 法駕行真遊今寂寞往跡尚分

明宿草春頻換孤臣淚不晴知君舊侍從同我此時情

別長卿奉使北關 諸陵

鶴城官路憶曾經最愛蘭舟艤曲汀舊客自憐蓬鬢
白新詞猶記柳梢青遺民幾處迎行旆太守如今卽
使星安得共君追勝賞一樽重醉北山亭

恩譴削職歸磻溪新築贈別朴大興仲八 世柱

之任

歸臥磻溪一釣舟送君行色五驂騶功名等是槐安
夢湖海分符計最優

明村酒席錄奉仲八

毀譽河東且任之知君此去破羣疑燈前別爵猶辭
醉不用親朋戒酒詩

李洪州 暹 挽

城南別思尚依依湖外驚聞旅櫬歸媿睦更兼同榜
好存亡翻作異鄉違官仍烏府脩程促家在漁村舊
跡非咫尺江臯孤一哭淚和零雨獨沾衣

溪舍詠懷次朴思菴韻

危樓日夕見南山敢向江潭詠楚蘭時事漸同雲擾
擾客愁長似水漫漫黃扉往跡真如夢白鳥初盟尚

未寒榮辱是非都兩忘一竿隨意釣沙灘

別羅弟仲輔碩佐之湖西醉莫同春靈筵仍省

其表叔於茂朱縣衙

歷歷湖中路風烟畫裏開山藏護國寺水繞降仙臺

送爾乘秋去思吾奉使廻春堂香一瓣料得有餘哀

護國寺在茂朱赤裳山降仙臺在沃川陽山余於辛丑冬奉使赤裳皆余所嘗登覽故及之

觀音寺僧詩軸次白軒相公韻寺即相公墳菴詩軸曾被火燕

其上下端相公續題以志其事

爽氣箕星返陳蹤逝水東巖廊百僚式鈇槩一生功

事往傷心極僧來攬涕同唯應焦尾卷留映寺門中

南雲卿訪溪舍同宿翌日仍訪谷口鄭尚書於

冰湖有詩追寄次韻兼奉鄭叔

佳會依然已隔宵一溪秋色冷蕭蕭江村地近身無

事與到相尋不待招

次韻

谷口

不分聯床共一宵獨歸山徑草蕭蕭前江水落秋

堪賞倘向濠梁早見招

西郊拜別伯氏松讓之行

不是無兄弟其如有別離居然今日恨真似古人詩

風樹終天慕雲山卒歲期秋空見歸鴈羨爾一行隨

其二

解紱纔揚岳分符又沸流行程愁更遠暮景惜頻道
骨肉須團聚功名任謬悠待尋陶令賦丘壑共優游

其三

小店溪橋畔懸燈聽雨聲聊成對床話却送出關行
細菊重陽近寒蟲竟夜鳴江村秋草外寂寞獨歸情
豐壤途中望靈芝洞憶幼能有感

松門柳徑摠依依洞裏幽棲計已非重到昔年觴詠
地不聞隣笛亦沾衣

向洞陰曉發 光陵山下村

鐘鳴遠寺月含山隱映村燈樹裏看清曉獨尋前路
去洞陰秋色白雲寒

白雲山留贈金君聲大

瓊巖琪樹玉爲溪再入仙源路不迷茅洞卜隣從此
始與君分占水東西

寧陵遷葬挽詞

心傳精一志興衰大義千秋永有辭中道遽殂悲漢
業前王不忘詠周詩丘園士感風雲會吠畝民涵德
澤遺瓊廈 玉音如在耳舊臣猶記轉圜時

其二

清蹕聲傳劍鳥移楚山今日復朝儀靈丘地獻千年
秘窮谷人含十載悲密邇先陵依 聖祖葱瓏佳氣
擁神祇羣巒拱揖長江護奕葉盤根自此基

其三

銀臺往事夢猶驚咫尺 宮車見大行當日未酬非
分寵祗今還負不忠名攀髯永隔騎龍地殉穴終孤
蓐蟻誠零落賜貂餘雨露白頭啼血愧殘生

宋原州

時詰挽

曾送驪駒聽玉珂忽驚歸觀動鈴歌風儀幾恨三年
隔襟抱猶思一味和宿望縱孤周陝擢諸郎還比馬

常多他時金鳥山前路露草荒阡掩淚過

燕行時集兒隨到箕城辭歸口占書贈兼示諸
兒

世味全消世路艱餘生只合早投閒石田數畝雲溪
畔好勸春耕待我還

其二

為學無他在及時三冬文史莫停披襟裾牛馬存深
戒看取昌黎戒子詩

和俞伯圭

賜寄別韻

世故悠悠奈老何朋知無幾別離多君尋初服歸雲

壑我放孤槎入玉河已識浮生同泛梗偏憐暮景劇
頽波春來擬遂分山約共和滄浪桂樹歌

將渡鴨江謹次伯氏追寄韻走草以呈

此別雖遙只判年可堪存沒隔重泉西來掩淚頻回
首想見新阡積雪邊

其二

榮枯得失已忘情閱盡危機夢亦驚分得白雲山一
半石田茅屋養殘生

其三

哀哀風樹尚餘生孤露人間萬念輕天際白雲無復

望別離今日隔幽明

寄人

荒山毳幕雪為茵獨夜歸心月半輪關樹尚懸天外
夢驛梅誰寄隴頭人書來別恨偏多慰老去交情始
見真廿載重遊君莫問感懷依舊鬢毛新

通遠堡

驅車越嶺項嶺路不容軌山開大野豁一望二十里
北折得孤店鎮夷舊堡是蕭條幾人家歷歷征戍地
飢鳥集頽垣衰草沒古壘誰教漢提封盡屬天驕子
觸境却興嗟感懷何時已殘燈旅館夜萬事悲歌裏

遼陽客夜書懷

擊劍悲歌行路難天涯又見歲時闌才非濟世徒憂世志在休官尚繫官窮磧雪風愁裏度故山烟月夢中看孤懷悄悄憑誰說旅枕三更燭影寒

牛庄寄示兒輩

行盡西關更向西故鄉回望塞天低書從鴨水無人寄夢到龍沙失路迷殘雪竹林思岳麓冷烟茅屋想磻溪東歸不落春風後報與妻兒理舊棲

十二月十六日宿山海關城中夜夢與李友幼能相見宛若平生以我有燕行贈以一詩有曰

次羣從韻贈別云云詩語了了可記俄忽驚覺只記解劍分攜四字而餘皆忘之間夜何其則落月已挂西城矣記余癸巳冬赴燕也李友解佩刀以贈兼有勉戒之言今余又有茲役而李友已作泉下人矣屈指未二紀而人事之嬗變至此已足可悲况萬里之行無有以一言爲贖者顧念疇昔愴恨盈懷豈冥冥之中尚有相感者存發於夢寐如此耶呼燈起坐不覺感涕自迸遂書一絕以志之

解劍分攜廿載前只今離別間黃泉神交不隔平生

百夢罷關山落月懸

獨樂寺

百戰城池一寺殘夕陽愁對舊河山千秋獨臥樓中
佛萬事無知羨爾頑

元日 甲寅

椒觴誰復勸屠蘇客裏偏驚歲序徂家在海東箕子
國路窮天北召公都風塵壯志青蛇老江漢初盟白
鳥孤三復篋管三秀語半生回首一長吁

春雪

新春飛雪墮如筵半夜寒威病客知疎響鬪風和夢

聽素華欺月隔窻疑梅花不待吹長笛柳絮偏宜入
好詩遙想故溪漁釣侶獨歸沙渚一蓑披

感舊

曾隨使節入燕雲專對徒憑二老尊沂相清規欽玉
潔沙翁和氣挹春溫三千里外今重到二十年來我
獨存到處遊蹤渾似昨客中心事與誰論

山海關

誰言形勝冠區寰漫入書生感慨間地拆青齊通鉅
海天回紫塞抱重關長城自照秦時月碣石空留禹
貢山試向中宵看北落威弧行復幾年彎

中前所記事

盧龍城外倚斜暉陵谷依然世代非古石摠疑飛將
虎春蔬空長伯夷薇誰從濁世追清節尚想戎庭振
武威欲向荒墟尋往跡瓊廬滿地舊人稀

杏山曉發

關路風沙馬不前暮投孤店暫停鞭家鄉別久春多
夢逆旅愁長夜似年荒戌月沈看鬼火曉厨烟冷汲
冰泉明朝又過凌河去白草黃茅望渺然

十三山途中

燕臺見月幾回圓雪盡遼河始出關鄉信莫憑春鴈

到客行爭似暮禽還王程屈指猶千里世事關心更
百般歸臥一丘知有地落花流水洞陰山

廣寧

廣寧舊雄府形勝擅關防藩屏扞薊門控扼通遼陽
北壓龍庭濶東臨鶴野長臺隍既險固士馬亦精強
漢道昔全盛 皇威何遠揚授鉞簡上將開營鎮邊
疆烽烟絕警急虜馬無跳梁攬槍一彗孛鎖鑰空金
湯經營百年功轉眄成荒涼天運固難測人謀豈云
臧遺民化介鱗過客感滄桑悲風動衰草夜烏啼女
墻桓桓李將軍壯略今則亡歸然石牌樓獨立如靈

光欲尋賀老居舊跡無人詳九原不可作惆悵挹遺
芳唯有巫閭色萬古長蒼蒼

自盤山抵沙嶺是日大風雪

逶迤度隴坂詰曲循車轍茫茫野浮天獵獵風捲雪
人愁塞日沈馬怯河水裂薄暮投古戍羈懷轉孤絕

三义河

混混三义河橫截千里野遙穿大漠來直向滄溟瀉
全遼割東西天塹別夷夏世事幾回變河流不曾舍
未洗漢將劍空飲胡雛馬我行今四渡臨流歎逝者
乘槎異博望擊楫慕士雅新亭不盡淚更向寒波灑

遼陽

遼陽舊邊郡形勝壯東裔民俗雜夷羯地理連幽薊
古來重防戍於焉事控制誰言漢策失坐見胡兵獊
荐食自茲始神器遂腥穢天心信難諶志士欲裂眦
我來過遺墟俯仰增一涕欲尋華表柱舊跡已荒翳
孰云城郭是蓬蒿沒睥睨令威倘再來定復悲人世
河傳匿燕丹山憶駐唐帝報秦徒速禍征東亦失計
空餘白塔巍萬古浮雲衛緬懷阜帽人高風真罕儷
堂堂浮海志只今復誰繼英豪鳥過空徃事水東逝

仁宣王后挽詞

德水源流大曾沙積慶遙家聲推馬鄧壺則邁莘蟠
險阻經瓊野柔嘉稱翟瑜王風始樛木私徑屏塗椒
每切司晨戒爭瞻儷日昭陰功資密勿坤化及肖翹
湖鼎丹初就湘筠淚未消教成周世子位正漢東朝
服練慈儀肅含飴樂事饒尊榮一國養壽祿萬民謔
海屋方添筭軒躔遽報祆鏡奩如宿昔駟輅已重霄
孺慕同虞舜微稱配女堯桑壇春寂寂湯殿月迢迢
緬禮纔前歲廡行又此宵鮒隅遵並壤鵠首替浮橋
象設因山擁銘旌溯水飄哀號均率土攀送共羣僚
社飯懷餘澤宮袍泣舊綃微才愧椽筆記德在瓊瑤

又代述

厚德宜遐筭真遊遽帝鄉淒涼湘浦竹蕪沒濯龍桑
玉冊詞臣撰彤編女史將年年春社飯遺澤泣鵠行

其二

侍藥誠徒切因山事又敦灤朝纔改隧周祔卽同原
廡衛遵江路靈帷掩殿門攀髯十年淚今日更添痕

南判書雲卿母夫人挽

論交早接阿戎談壽席賓筵我輒叅七袞猶稀更借
老一兒能顯豈多男榮光已覺門閭溢懿範仍從酒
食諧今日棘人風樹慟想來嗚咽淚先含

顯宗大王挽詞

仁如 聖祖孝 寧王化本躬行被四方民賴煦濡
忘水旱士從耕築致巖廊文齡却爲憂勤減武烈元
因繼述彰沒世深恩詒後業千秋編簡有輝光

其二

融融慈孝 兩宮諧一歲胡然荐此哀纔感鏡奩遺
漢寢忽驚弓劍墮軒臺嚴廬泣血仍添疾靈座陳衣
忍見縗千乘至尊曾閔行百王誰並漢唐來

其三

臣罪當誅 聖度弘尚留殘喘哭天崩虛名再忝金

甌覆末命仍承玉几憑誠切答恩嗟蔑效職叨敦匠
愧無能玄宮一鎖開何日頭白人間獨拊膺

甲寅冬 因山甫訖旋遭駭機蒼黃出城僑寓
冰湖鄭相亭舍屢辭未解職欲歸磻溪而亦不
果翌年二月二十四日卽 仁宣王后練暮也

入城叅 闕外哭班乘曉卽還途中感懷口占

前夜大雨雪 乙卯

春雪夜盈尺江村歸路迷清晨驅馬去落月向人低
象魏空餘戀柴荆未定棲遙看舊隱處獨樹護磻溪

江上夜望

小閣宜閒望羈愁費獨哦孤村數燈映遙渚一帆過
夜靜江湖白春寒雨雪多行藏猶未卜無興戀漁蓑

祇役 寧陵歸路舟下龜尾浦與李樂甫羅顯

道會晤醉後書示二君

野店臨官路歸舟艤曲汀江深龜尾浦山斷鳳頭亭
世事唯雙涕吾儕且獨醒升沈與聚散等是一浮萍

次韻寄遼陽李之淮

字浦來本江西人
家禍流落遼東

乾坤莽蕩一身殘華表千年鶴影寒古獄龍泉誰解
斷斗牛冤氣夜漫漫

其二

相逢傾盖卽歡顏一別經年兩鬢斑唯有夢魂無遠
近不關遼塞萬重山

乙卯七月應

旨進言

天怒大震臺評隨發

初 命付處原州行到楊山聞改

命遠竄靈

巖轉向南路路上口占

三朝忝竊百無能一發危言衆所憎立馬王灘江上
路西風吹淚入 崇陵

公山途中

巖程迢遞極南荒逐客還隨候鴈忙車嶺暮雲迷去
馬錦江秋雨濕行裝孤忠自許心如血萬事無成鬢

已霜惆悵故山空入夢綠蘿烟月夜蒼蒼

族子盛最以金吾郎押余行到靈巖還歸臨別
協兒偶吟謫仙詩句暗合今日情境故足成以
贈之

月出青山送行子四邊苦竹秋聲起分明千載謫仙
詩情境依然今日是

漫吟

絕域天南徼孤城古朗州行藏隨分定放逐荷恩優
夜雨鳴山竹秋風落海榴偏憐月峰色相對慰羈愁
月夜次柳子厚登城樓韻

露下空階蕙草荒浮雲翳月影蒼茫秋深斷鴈呼遙
渚夜靜流螢過短墻玉宇遙懸蘇子夢劍峰偏割柳
州腸餘生倘見昇平日不恨羈蹤落異鄉

頭流聰上人曾於丙申年間一見於三角山之
重興寺伊後不復知其所適今忽見訪於朗州
謫居投贈近體一詩躑躅杖一枝留一宿而去
風誼之高有足多者回思舊遊依依若昨日事
而楊枝豆子倏已二十春秋矣孰謂復續竒遇
於嶺海千里之外耶此誠不可不歸之數也余
之不作詩久矣厚意不可不報上人索之且勤

遂依韻草綴以贈之

羈人蹤跡風飄葉老釋心期月印潭鵬舍相逢知有
數虎溪何必笑成三重興古寺思千里方丈羣峰跨
兩南攜贈瘦筇無處試且容孤夢到禪庵

敬次尤齋寄示韻

月出山頭月出時孤吟坐到月西歎遙知此夜蓬山
月千里清光與共之

原韻

一柱亭亭獨立時狂瀾怒觸未曾歎誰言東魯斯
文喪羸得千秋永賴之

鄭直長蒞來訪以菊花酒見餉詩以謝之

東籬佳菊飽嚴霜釀作新醪滿甕香珍重攜來知有
意落英元合楚臣嘗

用東坡夜坐與邁聯句韻與兒輩聯句

風淒竹葉鳴夜久燭花吐述自海近潮應溪樓高月侵

戶集窮閭吠寒狔凍穴蟄幽鼠協羣物息深更凝陰

集重庶翁北書阻繫帛南音厭歌紵業楚騷續紉蘭

商頌聞曳屨緝去國幸攜家趨庭看並武勗哉詩禮

傳庶幾無忝祖述自

協也還洛用兒輩酬唱韻書贈

相攜有書卷相伴度寒宵子似東坡過州同南海潮
追隨忘客久辭別覺鄉遙獨掩柴扉臥孤燈更寂寥
敬次伯氏歸自谷雲過宿鷹巖感懷寄示韻

相攜何日共清閒世路風波十載間秋盡瘴鄉歸夢
遠白雲松月滿空山

又用唐詩集句錄呈

長擬求閒未得閒百年多在別離間秋風嫋嫋吹江
漢歸去磻溪夢裏山

寄李喜朝

人去靈芝但廢墟一池明月自盈虛知君努力追堂

構復續龍門舊受書

李君先人靜觀公會卜築於豐壤靈芝洞未就而歿今李君能

繼先志結茅洞中舉家移居故感而賦此

昔蘇長公謫黃州劉元城竄嶺表年皆四十七
今余遷謫之年亦與二公相符漫書以志之

志節平生愧昔賢明時遷謫亦徒然同符坡老臨臯
歲恰值元城過嶺年豈有堅誠稱鐵漢兼無豪興挾
飛仙唯應隨遇安吾分得喪榮枯一任天

悼天 丙辰

羈旅失幼子昔聞黃州蘇今我遭此慟異代還同符
我衰汝母病得汝誠不虞豈曰鮮子女襁褓情愛殊

日望見孩笑供此暮景娛汝妹縫汝衣將以佩瑤瑜
汝兄護汝病手自持藥爐萬事遽墮空變滅真須臾
徒令我腸肚如割復如剗汝母晝夜哭徃徃絕而穌
呱聲猶在耳漲乳已濺襦昨宵抱懷中今晨委山隅
炎方非我土憐爾魂更孤念此益酸楚生趣忽如無
亦知夢幻妄情鍾實在吾與奪欲問天誰能送玄夫
空餘東野淚徹地到黃墟

其二

汝身初未生我無喜與悲旣生旋又死悲喜竟由誰
天欲夭汝命胡然賦異姿眉角真類我骨骼秀且竒

吉夢兆維龍命名實在茲徵之相家書貴格皆合規
訊之日者卜亦以老壽期謂天生不偶恃之不復疑
明珠在掌裏撫摩唯恐虧豈知遽奪去化翁故相欺
得非我罪重惡業累其兒念汝在腹日隨母到南陲
未晚遭撼傷臨病乏藥醫使汝生未遂爲父愧不慈
我喜不盈眦我悲無窮時棄置欲勿思宛宛如見之

百年慚痛意淚盡昌黎詩

韓文公哭女孀詩云致汝無辜由我罪百年慚痛淚

追次協兒除夕韻

遲暮年更促羈旅意易傷靈芝幾回秀素髮徒自長

今宵聞爆竹非復故鄉聲起視斗柄迴天運又周星
攬涕獨竚貽美人隔西方黃昏不可期白日去堂堂
雲裾與玉佩皎皎誰為光驚風撼丘木怵惕悲未央
參辰各天未望望難合并百慮紛來集曙鐘忽已鳴
唯思體行健努力期月征

答李長卿用余荒字韻見寄

門掩囚山枕大荒故人書到手開忙江南消息梅為
信澤畔衣裳蕙是裝靜味君能安吠畝枯形我已任
風霜先朝往事那堪憶共躡花甌韻水蒼

答李弼卿

翊相

用荒字韻見寄

溪廬無主石田荒旅夢西歸幾度忙已判軒裳身外
物獨攜書劍橐中裝丹心莫奪葵傾日白首真同草
負霜唯有月山如舊識萬峰當戶送青蒼

李尚書長卿承

命掌試到南原馳書相問且

以三律見寄次韻以答

經年遷客滯南陲春到荒村病起遲湘浦蕙蘭香寂
寞杜陵花竹夢參差誰知瘴海傳筒地尚記蓬山並
武時牛島鵲橋成悵望兩鄉明月一般思

南原

其二

朋簪離索且休悲膠漆深情各自知身退不妨專一
壑義安寧恨竄三危窮通已任時來運去就元同歲
暮期湖外却思關北會篋中重閱十年詩

其三

疎蹤本合老耕樵每愧虛名長百僚側足幾經危險
路狂言無補 聖明朝江潭芳意空蘭佩京洛春光
已柳條榮悴百年皆定分此心唯有寸丹昭

原韻

相公胡罪尚邊陲千里南來命駕遲有限王程成
悵望多端世故奈參差風流悅接春生處山色頻

疑月出時官冗惱人排不得只憑詩句慰相思
明時獲罪儘堪悲敢道天心未敢知憂切詎忘同
進退身閒孰任佩安危陪歡北塞真如夢掌試南
壩本不期官暇起居違夙計鵲橋吟續鶴城詩
邇來吾道本漁樵非復鷓班見舊僚何患無辭加
以罪誰曾不欲立於朝龜藏郊舍經三載雞肋官
銜愧一條否泰固知關世運古今天日本昭昭

次韻述悼天之懷寄朴大興仲八

一夢懷中物孤魂海上山南來差制淚爲爾不禁潛
翁兒挈其婦子北歸悼天之餘只一幼孫又去

膝下情事益不可聊臨別口占韻語以贈

白鶴辭故林南飛到海隅舉族託新棲有子亦將雛
迢迢楚山下翠竹映碧梧喜爾日停峙飲啄相煦濡
豈知南鬼惡令我不相保奪我掌中珠委彼壠上草
我淚且強拭所慰爾在抱百沴迭侵凌損爾顏色好
炎方難久淫朱火熏黃霧綦綦蝮傷躬蝮蛇或如股
嗟哉微我故爾胡爲此土羈窮我不辭恐爾罹災苦
欲別旣不忍欲留更百慮遲徊日復日今日便決去
回翔爾躑躅撫頂我吞聲忽忽獨在陰誰歟和我鳴
南禽嫁胡鴈臨別尚沾衣骨肉恩愛重那堪此分飛

簷有哺子燕林有生孫竹物性有如此我心增感惻
葦嶺一何高滌湖一何深遠道苦多風脆翰恐難任
網羅彌天地何鄉樹可依珍重養毛質時來爲羽儀

敬次仲氏寄示韻

梨花滿地月臨門半夜聲聲杜宇魂寒食楚鄉無限
淚一年春草隔丘原

其二

湖海棲遲異鬼門楚騷何用賦招魂誰言賈傅同生
死漫向湘流吊屈原

敬次仲氏與李弼卿酬唱韻

天涯落落各參辰世味同嘗幾斗塵兄弟一時三事
列嶺湖連歲兩羈人原鴿急難詩重詠隍鹿功名夢
不真却羨瓊雷雲海隔相望猶得信音頻

原韻

華岳遙瞻拱北辰日邊歸夢隔清塵差甘寂寞寬
閒野寧作欽崎歷落人雞肋棄來心始黍菜根咬
後味方真霜風昨夜凋門柳一任榮枯替換頻

病中遣悶

送盡三春獨掩門病懷孤絕不堪論愁邊細草封幽
徑夢裏聞花落故園地似湘潭徒極目身同屈子孰

招魂遷居尚喜饒清趣占得孤山近水村

孤山在寓
居村邊

其二

茅茨寥落俯清溪溪雨廉纖溪柳低竹外桃花紅半
謝沙邊蘋葉綠初齊東坡未效蘇仙築南澗還追柳
子題山鳥不知浮世事勸人歸去盡情啼

次韻寄謝弼卿

病起殘春倍惜辰眼看花藥已成塵秦川柳色杳如
夢楚水蘋香愁殺人往跡可堪彈指變交情難得掇
皮真唯君莫逆心期在珍重詩筒寄遠頻

其二

危途閱歷又茲辰苦厭浮生困六塵閉口休論身外
事開心且對卷中人昭琴自是兼成毀夜繡誰能別
偽真文字向來徒速禍短篇酬詠莫頻頻

其三

庭院無人草自荒忽驚春色轉頭忙雲端鳳闕迷歸
路海上漁村寄旅裝胡蝶夢回花似雪蜀禽啼罷月
如霜千林紅紫須臾事看取松篁一色蒼

三月望日卽事漫詠

梅窻竹塢淨無塵睡起風簷整葛巾幽澗響添前夜
雨好花飄盡異鄉春閒中簡策爲新業客裏簞瓢任

舊貧空谷不嫌還往斷野禽山鹿自相親

謝洪安邊國卿用先祖集中韻見寄

曾是西門痛哭人每從荆樹挹遺塵簫聲已斷秦樓
月詩夢空悲謝草春存沒幾年同掩淚別離千里重
傷神殷勤一札傳湘浦手把瓊琚唱嘆頻

次韻寄答李甥濡

春晚江南已綠陰竹窻微雨轉山禽支頤暫結還鄉
夢萬樹烟花繞禁林

其二

幽期曾託白雲閒歸計蹉跎行路難遙想峒陰春事

晚落花隨水到人間

李生儀朝來過慰倒之餘感懷書贈是日適餞

春

澤國風兼雨蓬門晝不開春從今日去客自故鄉來
渚柳初飄絮山花已點苔逢迎一杯酒存沒廿年哀

李生大人濟卿公辭世已過廿年故及之

青巖鄭督郵治來過書此以贈略寓勉勵之意

臨溪古驛竹為籬首帶青時馬正肥山館日長無箇
事一床黃卷是生涯

送春後一日復疊前韻

春事已無跡羈懷誰與開海雲含雨過溪水泛花來
步屨憐庭草攜筇坐石苔山禽亦何意欸欸有餘哀

四月初六日即事

樞府台階一夢如楚江蹤跡混耕漁茅簷晝永成孤
坐泣閱先朝舊賜書

漫詠

塊坐匡床到夕曛小爐香篆裊餘薰枯榮物理看花
絮翻覆人情付雨雲書到暮年知有味語關當世欲
無聞南溪賴有千竿竹靜裏心期託此君

四月初九日書懷

行吟肯作楚臣悲，偃息江潭亦聖涯。敢擬涪翁成
易傳，空追坡老和陶詩。風波定力樵夫問，春夢浮榮
饜婦知。安分樂天吾不愧，古人千載共心期。

協兒與鳩林諸人遊石門而還有詩次韻寄興

月出羣峰散不收，芙蓉數朶半空浮。懸厓置屋何年
創，絕頂飛泉太古流。巖磴僅容孤鳥度，洞雲長伴老
僧留。湘潭咫尺成匏繫，付與閒人爛熯遊。石門即月
出山旁支

五月初四日志感

鐵杖苔生木馬塵，喬山松柏幾回春。宏規大義今埋
沒，楚澤中宵泣舊臣。

端陽感懷

馬醫牛阜有兒孫，麥飯家家灑古墻。誰念瘴江千里
客，故山回首獨傷魂。灑一作祭

端陽卽事

溪橋過雨長蒲芽，隱映秋千竹外斜。深院寂寥人不
到，鷓鴣飛上石榴花。

見伯氏書自谷雲將移向嶺東感懷寄呈

天涯忽見長公書，報道棲棲未定居。貊國山川難久
住，溟州風土復何如。荆花飄散辭枝遠，鴈序差池著
影疎。吟斷竇家詩上語，飛鴉落日更愁余。唐竇鞏寄
南遊弟兄

詩有寒鴉飛去
日舍山之句

哭綾豐府院君具公 仁堅

五十功臣白馬盟 四朝完福一人羸
淒涼魯殿靈光在 寥落晨星壽曜明
麟閣丹青瞻舊像 龍驤部曲泣新塋
泰山若礪河如帶 留與雲仍世世榮

晝眠

抽林嫩籜綠初長 六月清風四面涼
浮世任他蠻觸鬧 北窗晴晝夢羲皇

六月初十日即事

榴花落地細斑斑 竹裏柴門盡日關
微雨過來風滿

榻獨憑烏几看青山

睡起

門徑寥寥夏日遲 竹床藤簟靜相宜
閒眠一枕無餘事 時讀文公續楚辭

夜雨

蕭瑟竹間雨 潺湲階下泉
偏驚孤客耳 不遣暫時眠
敬次仲氏下示二律韻

幾歲辛勤有此家 幽棲獨占北山霞
雙溪水石閒情足 二陸東西樂事多
活計任從窮鬼弄 亭臺輸與別人誇
遽廬天地元如許 得喪隨緣且莫嗟

右賣宅韻

半年社飯泣佳辰寂寞長秋撫跡陳尚憶往時無射
月叨陪 廡衛廣陵津玄宮永闕嗟何及清廟初躋
愴更新卷耳關雎留舊詠周南心折一纍臣

右聞 仁宣王后祔廟禮成韻

次協兒途中寄來韻

下二首中秋見月作

休煩陟岵望吾還且喜投荒得此閒浮世是非渾不
管竹亭微雨對秋山

其二

輕雲散盡月如烟極浦微茫水接天今夜素華人盡

望客心偏在北辰邊

其三

蕭騷籠竹暗浮烟風露淒淒五夜天遙想北山溪上
月幾人回首瘴江邊

先王祥日曉起望哭志感

鴻恩未報寸腸摧又見人間八月來憑几忍思承未
命抱弓無處洩餘哀風霜瘴海身猶滯松柏喬山夢
獨回哭罷荒原秋草裏滿襟清血徹泉臺

敬次伯氏籠水亭和崔孤雲韻

百折清溪繞碧巒茅茨寄在水雲間何時得遂鴿原

約棲息同分一半山

原韻

孤亭幽絕倚層巒萬壑清流隔世間自覺心閒身
更遠是非何得到青山

重陽無花無酒漫吟一絕

佳節殊方物色稀一樽無計醉芳菲柴桑舊事還堪
羨滿手黃花對白衣

月夜用詩經集句

蟋蟀在堂白露為霜夜如何其月出之光輾轉伏枕
我心憂傷彼美人兮俾也可忘

哭尹晉州

衡聖

魚符瘴海宦情闌封署喬山淚未乾纔喜歛裳歸栗
里忽驚推枕失槐安繁花玄觀爭春色古柏烏臺任
歲寒秋晚漢南雙劍合百無堂月好誰看

其二

清風竹簟雪花牋更有離騷寄一編高誼每從窮處
見累蹤偏荷丈人憐凶音遽報翻如夢謝牘纔封竟
莫傳掩淚他時逢宅相袁公額角却依然

秋懷

楚山蕭瑟楚江寒上有楓林霜葉丹流水尚能朝大

海浮雲只解蔽長安后皇嘉樹偏憐橘南國幽香獨
佩蘭莫把新詞賡九辯由來苦調易悽酸

其二

屋角凝霜晚六
籬旭日冷暉暉西洲水落魚龍
蟄南畝禾殘鳥雀肥錦里羈人桃竹杖湘潭騷客芟
荷衣浮生不用懷鄉陌著處心安即當歸

其三

輕寒乍透木綿裘一夜歸心在玉樓萬事忘懷唯戀
主四時隨運獨悲秋湘江雷雨恩猶阻京洛風波夢
已休天遣仲翔疎骨節敢辭南海久羈留

其四

慘慄秋懷獨掩門小庭殘照易黃昏蟲收亂響初坏
戶葉隕高枝欲晦根際海巖巒瞻月嶽隔溪祠廟挹
烟村天機袞袞兼人事坐閱東流萬壑奔

烟村崔德
之有書院

其五

竹間茅屋靜深更坐到前簷北斗橫明月遙分秦地
色清砧又聽楚鄉聲風林撼撼飄寒葉露菊淒淒委
落英忽有征鴻連陣過天涯喚起弟兄情

其六

背郭僑居一草亭秋花野蔓護柴扃山從落木增新

瘦竹為凌霜自舊青簷畔飛來賈傅鵬案頭乾死鄭
虔螢間中漸覺塵根淨默驗靈臺萬理形

其七

桐江南畔是磻溪一壑風烟戀舊棲松葉夜迷山後
徑稻花秋映井邊畦書藏破篋封蛛網塵暗空梁帶
燕泥同社向來多釣伴一竿明月夢相攜

其八

買得青山不愛錢幽居曾卜白雲邊泉甘盤谷誰爭
地洞邃仇池別有天茅棟未成臨礪屋豆苗應沒斫
畚田鷹巖松桂龜汀月興入秋風望渺然鷹巖龜汀在白雲山

敬次伯氏寄示韻

寂寞孤懷只自知天涯又復送秋歸陶山松菊雲溪
水惆悵空尋夢裏期

原韻

世事紛紛不可知秋懷慘慄送將歸鷹巖雲洞無
多地安得同為歲暮期

十月初五日曉夢拜 孝廟覺而書感

一抱烏號歲幾更答恩無地只丹誠風雲盛際悲前
事嶺海羈蹤愧此生夢裏 龍顏纔咫尺覺來 天
語微分明寒齋撫梳空揮涕曉雨蕭蕭苦竹聲

朴和叔世采曾於去冬用其先王父梧憲公在
謫日贈先祖韻見寄次韻追謝

離索中年阻往還超然高躅邈難攀專精志業誠明
上潦倒身名寵辱間去國梁噫徒激烈傷時表涕自
潺湲相看晚節真同調半世升沈揔是閒

其二

夙志嗶嗶慕古人迷塗失脚走風塵愆尤久積尋常
地醉夢虛拋四十春暮景尚堪回轍跡微言方覺醒
心神端居只恨違朋益獨詠停雲悵望頻

原韻

文谷相公久謫朗州思欲以句語寄懷偶
閱先王父在謫時贈仙源清陰二先生之
作怵然興感步韻却寄

自從泮水上書還卅載台階不可攀白首遯居西
海外丹心致主北辰間漢朝黨籍身俱放魯國葵
憂淚並湲莫訝爾來均出處石山高仰暮雲閒
我本江南錦里人生平夢想出紅塵仙區月嶽無
多地嘉樹山茶度幾春砥柱政回滄海色晚顏空
對屋梁神涪州學易今能及不用離騷作賦頻

清陰老先生之教曰吾恨不克熟讀周易此真
衛武好學之心况於明公今日乎敢並及之

敬次伯氏韻

肯學長沙吊屈平
羈蹤甘作楚鄉氓
窮來物理看差
熟靜裏心源覺轉明
一榻圖書耽夜永
四隣雞黍樂
秋成朝朝卷箔閒
相對獨愛青山不世情

原韻

身計年來擬尚平
清時唯幸作逋氓
襟期物外青山好
心事天邊皓月明
莫把虛名論得失
默觀浮世有虧成
晴窗靜寂蒲團穩
一卷書中萬古情

夜景

九峰蒼翠淡如無
溪上茅茨夜更孤
枯蔓倒霜懸敗

瓠瘦枝橫月露棲
烏村燈竹外聞機杼
隣井籬間轉
轆轤別有畸人清
坐地一床黃卷一薰爐

敬次伯氏懷蓬山謫居次陸放翁韻

過嶺行裝炎海畔
叅天榕棘大荒東
精神不隔山河
外道義相期簡策中
自笑功名輸穴蟻
誰教矰弋到
冥鴻乾坤俯仰還
無忤素學平生在固窮

原韻

褊性從來難混俗
一丘初占白雲東
幽蹤自在紛
華外樂意長輸水石中
嶺嶠逢迎如昨夢
蓬山消息斷歸鴻
明窗靜對書千卷
莫向人間歎道窮

又用前韻寄懷

天遠衆星爭拱北海平羣壑自流東荒城草木經秋
後故國山河入夢中千里壯心悲櫪驥百年陳跡付
泥鴻重陰莫道微陽息一理生生本不窮

次臨瀛府伯李弼卿寄伯氏韻

中年非復別離時失路分飛更可悲溟海古城鳧舄
遠谷雲窮峽鴈書遲晨星兩地空相望夜雨連床未
易期最是漳江搖落恨屋梁殘夢陟岡詩

次李甥世白見寄韻

年華世故兩相催又見衡陽鴈陣回身落瘴烟愁地

遠澤垂雷雨荷天恢西江風浪無時靜鼎水烏號沒
世哀溪老野僧同混跡舊班誰復記中台

次韻寄題金德者

命碩

肯構堂

幽居相得地形宜堂構初完卽舊規棟宇自能安儉
素林園何必費瓌竒庭柯影接松楸壠畦稻香交菑
舊池容膝百年堪寄傲喜君重續去來辭

又次前韻寓懷並寄

罪大投荒分所宜還慚涉世乏良規人情閱盡翻仍
覆物理推來偶更竒末路朋知多契濶故山歸計易
差池天寒竹屋衡門掩獨對殘燈詠楚辭

朗州冠緝兒纍居樓遑未能備三加之禮聊述
韻語書示用寓戒祝之意

我年近半百已看爾弁突冠者禮之始聖人重斯節
加爾以元服辰良日又吉幼志自茲棄成德自茲述
威儀必祇慎造次罔或失名緝字敬明望爾深且切
為學貴接續惟敬德乃一勉勉久不息光明終透徹
率性斯踐形庶不愧前哲母忝祖先訓母若乃翁拙
天其禔爾躬福履到耆耄顧我方處困未免儀度缺
然念成人責在德不在物短篇代祝辭欽哉爾母忽
送翁緝二兒上洛翌日風雪寒甚念之有作

雪落北風厲天寒掩竹屋遙遙念游子今夕誰家宿
不眠

櫪馬飢屢嘶時雞寒更叫窻間不眠人相伴到殘曉
寒甚

南土亦嚴寒前溪一夜凍誰知積陰底已有微陽動
訪孤山寺留題示居僧

有入定僧
數人樓寺

昔蘇東坡在杭州臘日游孤山寺有詩紀其
事余謫朗州聞月出孤山之勝偶乘輿訪之
是日適嘉平也事有曠世而相符者亦異哉
遂留詩寺壁以備山門一勝事云

臘日孤山寺千秋復此游我無坡老韻僧有惠師流
洞雪封巖徑溪雲護石樓西湖生眼底剛不羨杭州

孤山僧惠勤惠思即東坡方外交也朗
州郡西有浦亦名西湖登寺後可見

宿道岬寺醉後書示鳩林諸人

清興悠然起病慵石門殘雪試飛筇危梯直躡孤山
寺絕磴平臨九井峰陰壑凍泉穿細竇上方明月度
疎鐘千秋豪氣追南嶽醉後長風更盪胸

道岬寺書贈法閒上人

并序

湖南之山月出最勝而月出諸寺惟道岬為宏麗
自余謫居朗州歲今再閱矣山固朝夕於几案而

寺亦不移晷可至也然未嘗一入山門以窮其游
覽以余罪纍懾處無意乎游而且方抱渴密之痛
游亦非其時也寺之諸釋每來過輒邀余游余辭
以故如此而諸釋之邀之愈久而愈未已也昔蔡
西山謫春陵投館光孝寺寺僧言于官云此人長
大恐不能制西山遂移他處余觀岬寺濱於孔道
擁傳之賓躡屐之士往來日無虛也緇流常患於
應接之不暇而顧於余申申懇懇猶恐其不得致
之若此其與光孝僧之訴逐逐客者一何相背之
遠哉信乎古今人同不同未可知也今 國哀旣

文谷集
闕且念諸釋之意不可終孤余爲至寺一宿而歸
有長老法閒者淳實可與語求余詩甚勤余仍叩
其所存則閒之言曰若絕粒面壁抗尊法席則吾
不能至於汨根塵冒戒律口梵唄而心駟僧亦吾
之所耻也余聞而嘉之譬之吾家其殆不離道不
絕俗之流歟若是則宜其遠背於光孝僧之爲也
遂書短律以塞其勤且以志余之游於是乎始云
世路無安地空門有好期西林攜總老南海對顛師
發省晨鐘在分眠夜榻宜從今山徑熟棕竹數追隨
還自月出次柳柳州登西山韻紀勝寓興

寒山有爽氣宿雲卷清曉輕輿入洞門危磴行木杪
岡巒勢崩奔際海青未了平臨南極低俯瞰東魯小
日容礙峰尖湖色映林表溪風更疎松崖雪唯孤篠
回思三劫空苦厭六塵擾楚凡等存亡顏跖錯壽夭
大化亦紛綸浮生儘微眇身閒且放浪境勝轉清悄
結跏愛定僧安巢愧幽鳥中宵耿無夢石榻泉聲繞
夜坐

心事半壁青燈生涯一床緗帙夜深知有微風窗外
叢篁蕭瑟

記事

南隣簫鼓巫迎鬼北里香燈瞽說經
覺舍閉門槐杏冷夜窻絃誦寂無聽

次崔內翰

錫 賜

見寄韻

古城蓬藿掩荒扉清坐蕭然萬念微
詩爲畏人頻毀藁淚緣憂國欲翻衣
孤蘭翳草香猶在喬木經霜葉已稀
榮悴莫論身外事海鷗沙鷺共忘機

其二

依依歸夢掖垣扉雪壓觚稜曙色微
天語宛承前夜席御香猶覺惹朝衣
玄都花木新春滿紫禁鷓鴻舊侶稀
瀟灑少年餘玉樹歲寒珍重慎危機

丙辰臘月二十三日曉夢與同春允齋二老相
會從容如平日春翁似將有遠適酒後春翁作
詩贈我覺來只記其二句云回首夕陽歸路遠
此心耿耿水東流餘不能記起坐諷詠愴感百
端仍衍其詩意口占一絕

詩酒從容夢裏遊寸心元不隔明幽忠君衛道平生
志長共江河萬古流

臘月二十三日大風雨徹夜不能寐口占二絕
怒勢奔潮至雄聲伏弩驚天公亦何事還作不平鳴

其二

天地晦如漆終宵風雨驚隣雞真有信不廢五更鳴

除夕書感

斗柄又東指遠客在南方此歲盡此夕令我自悲傷
我亦何所傷我亦何所悲不悲遷謫遠不傷年貌衰
年衰固常理謫遠亦我罪所悲世道否所傷學業退
有否必有泰何遲七日復退者猶可進何無尺寸益
狂瀾與急景一往不復廻揮涕顧宗國王綱日以頽
撫躬數前愆五十忽已迫陰陽有消長錯綜莽難測
至理在人心反求無不足時運諒無奈唯須盡吾責
文谷集卷之三

文谷集卷之四目錄

詩 一百四十六首

丁巳元日以荆公詩分韻作 十首

春帖 二首

幼子亡日口占 十首

為尤齋寄題煥章菴

正月二十四日夢作

三月初九日曉夢贈別朴仲八覺而記之

暮春病懷

初夏

五月卽事

悶旱

風玉亭夕望

六月二十二日驟雨

卽事漫吟

七月二十五日曉夢見滄江趙丈畫本口號

伯氏寄示記夢之作依韻口占

敬次伯氏書懷韻

趙學士宗著來過留詩次韻

敬次仲氏寄示韻 二首

敬次伯氏臥龍淵用晦菴韻

九日

婦弟李上舍 師命 內挽

十月初一日爲月出之遊入山有作

望嶽

重訪道岬寺書贈勝岑上人

道岬北池

次協兒北池韻

法閒上人房

東浮圖菴

南菴洞口小憇

南菴

南菴有月桂碧梧漫賦

次協兒吊義仁上人韻

歸時寺僧供花糕夕飯

出洞口下馬小酌

暮歸

次光山李使君彞仲用李弼卿韻

長兒挈家來會漫述一詩

次兒輩登城用柳州韻

同福趙使君雲老來訪有詩次韻

久聞赤壁勝槩無由致身其間漫吟寄興

送協緝二兒還京後口占

敬次仲氏韻夜坐書懷二首

次彞仲和弼卿寄示之韻

雪夜醉起步月

趙君景昌來訪臨別書贈

口占贈趙正萬

丁巳除夕用李白紫極宮韻

次尤齋至日見寄韻

感懷又用前韻寄呈

瑞石老僧永聞來訪呈七律三首走次其一
能弟南來見余臨別書贈

別能弟口號

暮春

春夜

春望

慎上舍聖尹求題二友堂次韻寄贈

為朴君世卿次高霽峰贈其曾祖韻 五首

哭姊兄李錦山

彛仲使君遺竹可且寄一律用其韻謝之

瑞峰寺僧萬勳來訪次其絕句以贈

萬勳沙彌自玄乞句口號以贈

南生有昌將往蓬山次韻贈別 二首

又用秋字韻寄呈尤齋

金君時瑞結茅鮎巖用其見寄韻賦寄

中秋夜感懷

次韻贈柳君燁然

次柳公珩贈延陽李相公詩韻

鄭君涖疏拓鳴陽星山洞舊墟賦二絕見示次

其韻却寄 二首

哭李尚書長卿 七首

寄題安用堂

月出南支有觀音臺山人時習結菴求記其事

用其師詩卷韻賦二絕以塞其勤 二首

次韻寄題寄旅軒

竹林亭十詠 十首

口號留別朴上舍世卿用其韻

留別曹文敬璨兼示鳩林諸人

留贈林族益瑞

烟村祠院未展一謁今當北遷口占一絕示崔

君宣錫昆季兼示院中諸章甫

留寄慎上舍聖尹

仙巖驛口號贈李彞仲

醉草贈李弟汝相

冒雨暮投井邑

泰仁次主守李君鳳朝贈別之作

敬次披香亭先祖題詠韻 二首

泰仁遇徐君鳳翎用其前日見寄韻書贈

泰仁逢金君道器感懷書贈

金君道器語及夢中石橋公報余行期之事賦

一絕以示

贈南生有昌

觀津道中

次宋甥相琦贈別韻

素沙感舊

過芝洞感懷

梁門途中憶白雲山庄

到東州

伯氏仲氏來會東州臨別口占錄呈

口占贈族姪歛谷守盛最

東州即事

分韻得日字

次朴徵之詠雪韻

春帖 二首

別李郎

除夜次唐詩韻

文谷集卷之四

詩一百四十六首

丁巳元日以荆公詩物以終為始人從故得新
分韻作十絕 丁巳

先春斗柄回穿雪句萌茁天地發生心觀時又觀物
其二

試看四時運何曾一息已造化本純誠乾乾君子以
其三

不有收藏妙那成發育功貞元周又復無始亦無終
其四

南國梅花信東皇桂酒詞風烟秦地隔樓息楚人爲
其五

險路幾摧車浮名一退屣冥行悟昨非迷復從今始
其六

獸樽非我分村酒答佳辰萬歲南山壽遙遙祝
聖
人

其七

聯翩衡浦鴈北向已噫噫奈此鴿原隔相思悵莫從

其八

千里去丘墓三年恰雨露淒涼老萊衣萬事揔非故

其九

天時任燠寒地理無南北一室海山中翛然還自得

其十

休嗟雙鬢雪且保滿腔春佩服湯盤訓吾身舊亦新

春帖

白玉青絲隔漢宮楚鄉盤菜亦春風年豐道泰丁寧
祝閒寫桃符學晦翁

其二

雪屋叢梅漏洩春紙窗初旭淨無塵靈臺自有虛明
界靜裏工夫驗日新

正月初六卽幼子亡日也欲付之忘懷而自有不能理遣者率意口占十絕亦坡翁一慟送餘傷之意也

汝命何苦短我痛無窮極閱兒亦已多未見爾英特

其二

生兮誰汝惠死也誰汝猜嗟嗟賦命者與奪理悠哉

其三

浩蕩麻衣書蒼茫簾肆卜孤辰與薄相幾許到黃馘

其四

生憎海南土埋却掌中珠積雪荒山裏孤魂知有無

其五

爾生類凡兒我哀應不深娟娟玉雪貌長見眼中森

其六

去年當茲辰調藥飲汝乳今日羨林鳥嗷嗷引子哺

其七

寸草萎霜雪春來還復榮天心何厚薄不教兒再生

其八

隔隣聽呱呱幾度錯疑汝去歲同時兒如今已學語

其九

忍淚已垂睫欲忘還復思吞聲向暗壁恐被汝孃知

其十

百念已灰冷愛根猶未亡誰將鑊錡刃割此方寸腸
爲尤齋寄題煥章菴

閔判書大受曾赴燕京得 崇禎皇帝御筆
非禮不動四大字以歸尤齋見之摸刻于華
陽洞裏石崖崖傍舊有書齋八九僧徒守之
遂託其僧使之看護仍以煥章扁其屋蓋取
論語煥乎其文章之意也

荆湖龍升攀不及地上羣臣抱弓泣宣和天子漠北
老花鳥春愁寄奎藻千秋魏烈揜前軌別有吾 皇

四大字聖人文章自天成昭爲雲漢爲日星尚思香
案揮灑時清燕從容臨硯池分明心法在克復率土
歸仁此可卜天崩地拆更堪說海水桑田真一瞥驪
山事異幽王禍陟方悲甚蒼梧駕風馬雲車已渺邈
瑤函金籥俱零落昭陵有書殉不得一任腥膻污殘
墨三韓使者幽燕市邂逅悲歌感慨士提攜相贈不
論直十襲歸來詫海域蒼生覆冒同苦心獨有
華陽翁華陽洞裏萬丈石好事何年鬼斧劈祗今鏡
刻若有待開鑿方知天意在驚鸞回鳳映翠壁日表
儼然瞻咫尺巖邊有屋傍礧隩屋角新揭煥章號緇

流相感亦意氣發願齋心謹守視剝落寧容牛角觸
摩挲不遺苔紋蝕祥雲環衛彩虹吐谷魅山魃共呵
護冤禽夜啼石欲裂不到蘭亭水亦咽回看四海倒
冠屨大明乾坤一洞府尊周微義寓於斯一心炯
炯誰復知唯應天壽山頭月照見孤臣滿腔血

正月二十四日夢作

一夜江南雨梨花雪滿庭遙知故山下春色草青青
三月初九日曉夢贈別朴令仲八佩綬之行覺
而記之

細雨青槐白馬嘶都門草色接湖西浮生離別何須

惜萬事如今醉已迷

暮春病懷

朝來風雨動微寒病起空齋春已闌新燕訪巢真有
信落花隨水太無端沂雩興入冠童詠溱洧詩傳士
女觀最是美人天外思芳洲何處採幽蘭

初夏

細逕疎籬逐岸偏樹陰初合竹陰連羣芳落盡春如
夢午睡醒來日抵年當戶山光濃欲滴隔林禽語靜
堪憐翛然自得羲皇趣一榻清風直萬錢

五月卽事

山谷集
江南五月野梅黃小雨新晴午景長繞郭叢篁初迸
笋夾溪畦稻已分秧天時物色看頻換世味人情付
兩忘麥飯一盂瓜一瓣珍烹不羨太官羊

悶旱

寒泉無賴浸高畦一雨前宵不滿犁遷客尚餘憂世
念却從村老望雲霓

風玉亭夕望

落景隱城陰前村有歸鳥散步乘夕涼微風動疎篠
亭臯面青山秀色來相繞盤桓興未已新月在林杪
蕭然杖屨間自無塵事擾夜歸對書床孤燈更清悄

六月二十二日驟雨滌煩喜而口占

萬竹陰陰弄夕陽榴花風動滿庭香浮雲忽送前山
雨添却騷人分外涼

卽事漫吟

蕭條僑舍枕城根草沒荒蹊樹擁門紅墮海榴初結
子綠抽園竹已生孫籬邊野老牽牛過壠上村童嚇
雀喧誰似此翁無所事一床書史坐忘言

七月二十五日曉夢偶於人家見滄江趙文

凍

所寫畫本口號四言四句覺而記之
其人已亡遺跡長新寒巖古木千載傳神

伯氏寄示記夢之作是夜夢陪伯氏仲氏杖屨
逍遙於峽山水石之間覺而有感依韻口占錄
呈

山北山南策杖行對床歡會水邊亭夢回始覺非真
境驚起竹林風雨聲

原韻

竹林深處夢中行恍是江南風玉亭一語未成身
已遠萬山秋月曉溪聲

敬次伯氏書懷寄示韻

楚江秋色近黃昏竹雨蟲聲坐獨聞忽憶鵠原千里

外滿山流水掩柴門

趙學士宗著以京試官到綾城迂路來過留詩
為別次韻以贈

嘉橘幽蘭楚國秋繡衣珍重問窮愁殘星長笛催詩
興倚徧江南幾處樓

敬次仲氏寄示韻

清宵奈此月明何唱斷蘇仙水調歌玉宇瓊樓秋氣
早孤臣歸夢此時多

其二

世事紛紛付奈何瘴江中夜獨悲歌延英十載渾如

夢秋草橋山白露多

原韻

江潭消息近如何
楚國秋風入九歌
臨水登山慄
慄意塞鴻飛斷月明多

敬次伯氏谷雲臥龍淵用晦菴臥龍菴韻

層崖擁深潭
化工費開鑿
神物臥幾年
風雲通碧落
匡廬舊佳境
宛在此洞壑
懷賢愛其名
千載尚如昨
紫陽有遺矩
盛事今繼作
不用莫牲醴
寒泉勝洞酌
公神無不之
斯丘亦可樂
長嘯望中州
腥塵正漠漠

原韻

巖開自天成
峽坼非禹鑿
神龍此所蟠
衆水深澗
落佳名起
余衷長嘯臨
絕壑清高有
遺像英姿凜
如昨慷慨
千古事逝者
不可作猶存
一寸心於焉
莫清酌誰能
識此意躊躇
悄無樂吟罷
出師表悲
風來漠漠

和

尤齋

武侯在南陽
所事惟耕鑿
殷勤魚水契
遽見將星
落廬山有奇
勝晦父尋幽
壑循名架小
菴渺茫已
非昨我友陳
編上朗吟當
年作徘徊撫
遺事謂言
海可酌况茲
羯奴時我生
非所樂清高
揭新居意

氣橫沙漠

九日

三年瘴海作重陽正似坡翁滯越鄉藍水把萸非舊
會楚江餐菊又新香無人解送東籬酒獨鴈驚呼北
地霜縱使登高徒極目浮雲何處認西方

三年瘴海上越嶠真我家
登山作重九蠻菊秋未花

婦弟李上舍

師命內挽

馬江西南流滔滔入海水上有相公墅樓臺面江起
忽看素紉出旌翼引廣柳借問逝者誰相公兒孫婦
本是名家女稟質更獨殊生得父母憐盈盈掌上珠

九歲不下堂十歲解助奠十一知禮儀十二誦女訓
十三賦桃夭雙鳳鳴椅桐衿鞶佩炯誠蚤夜必敬恭
小心事舅姑舅姑色欣欣和顏待妯娌妯娌情愛敦
家衆數十人皆言新婦賢十五喪阿爺哀號動四隣
孰云女子身執禮如二連郎君病連年心中常爇煎
衣帶未曾解湯劑必先嘗不惜賣簪珥綢繆備膳芳
藜羹口不厭無使郎或饑身上少完裙但恐郎無衣
至誠感神明終致勿藥瘳周庠二百士郎君居上頭
喜氣溢門闌福履看方將翁舅捐館舍人事劇悲涼
吞聲慰阿姑調粥護棘人夔夔饋奠間哀敬久逾新

卷四

詩

九

京華非昔時盡室適湖埂有母豈不懷女行難自專
淇水憶松舟中谷感葛葉他鄉少生理鹽米常苦乏
辛艱安足論所幸郎無恙祥琴重在御舖糜且共餉
珠胎待月滿寢夢占熊虺豈知妹笄生翻成二豎災
豔豔蕙蘭花嚴霜未秋隕胡香不可求魂去何由返
執手有成說死別在須臾當言不及言有淚枕邊流
迢迢驪江曲一夕幽問傳阿孀望南雲蹋地更呼天
那堪寸寸腸盡作巴猿斷嬌女纔六歲孤啼索母喚
綉中兩孩兒嗶嗶誰爲哺郎君夜輾轉腹悲無與吐
平生孝慈性貽此無涯戚上天本至仁而今理反錯

日月曾幾何祖載發中堂寒燈暖總帳塵簟依空床
馬爲立摧藏風爲慘蕭瑟隣里共酸鼻行路亦嗚咽
江頭一杯土殊異故山麓可憐首丘心生死違骨肉
魂氣獨悠揚東西無不之芳猷與詰範宜託彤管垂
張林今不在誰復勒高碑唯有馬江水萬古無歇時
十月初一日攜集協緝立諸兒爲月出之遊入

山有作

寒花錦石夕陽中客到山門秋已窮自是南州霜信
晚夾溪楓葉未凋紅

望嶽

晴雲捲盡玉嶙峋萬朵芙蓉秀色新願借山人飛錫
杖一登高頂望 楓宸

重訪道岬寺書贈勝岑上人

海國秋初盡山房客又來貪看楓葉樹爛醉菊花杯
細水遙通篔簹層巖自作臺居僧解惜別欲去重徘徊

道岬北池

醉倚溪邊石閒窺竹下塘藉苔爲坐席剥橘當流觴
水奏宮商曲山開綿繡粧觀魚知有樂吾不羨濠梁
次協兒北池韻

洞門空翠遠氤氳水碓寒聲到處聞苔逕客迷巖下

竹石壇僧掃澗邊雲松杉歲久皆連抱禽鳥林深自
作羣安得卜隣依白社一山風月與平分

法閒上人房

老釋幽棲地蕭然只一床看經常閉戶引水曲通墻
夜梵清塵慮秋花淨晚香他時隴月滿寄宿贊公房
東浮圖菴

萬竹通微逕孤菴寄一偏龕藏金像小塔湧石輪圓
文室團蒲淨閒階細菊鮮老僧休世念迎客亦欣然
南菴洞口小憇

蟬屐攀巖磴筠輿卸澗阿攜筇坐盤石濯手弄清波

山翠侵衣濕松風拂面多上方知已近僧語出烟蘿

南菴

古寺藏深樹危橋跨小溪客隨流水到僧與白雲棲
洞豁山當戶樓高石作梯依然一聲磬殘照竹林西

南菴有月桂碧梧漫賦

桂樹丹霞豔梧桐碧玉枝山寒香自馥露冷葉全衰
鳳鳥朝陽瑞王孫歲暮期難看九苞羽空詠八公詞

次協兒吊義仁上人韻

杖錫嗟何去山光似舊濃爐香住檀越庭草老門冬
廢榻跣跡空廊早晚鐘唯看曾宿客惆悵撫孤松

歸時寺僧供花糕夕飯

睡起禪堂靜鐘鳴佛殿虛秋糕煮山菊晚飯薦溪蔬
一飽斯為足重遊不作疎村翁更留客斗酒有新釀

出洞口下馬溪邊與鳩林諸人小酌

出洞攜餘興班荆坐水濱仍傾不盡酒更挽欲歸人
石閱寒波古山含夕景新清遊翻似夢自覺首回頻

暮歸

平蕪催暝色策馬望荒城暗聽樵歌遠時看漁火明
山蹊元自熟風露不妨清却勝藍田獵逢人問夜行

次光山李使君彝仲用臨瀛伯李弼卿寄贈之

韻

羈蹤一落海南陬粟里田園任廢疇坡老功名真似
夢楚鄉詞賦摠悲秋風波路險知難盡天地恩深愧
未酬唯喜月山隣瑞石歲寒相對慰窮愁

東坡在惠州和陶詩有云白鶴峰新居成自嘉
祐寺遷入長子邁與余別三年矣挈攜諸孫萬
里遠至老朽憂患之餘不能無欣然其詩曰旦
朝丁丁誰欸我廬子孫遠至笑語紛如剪髮垂
髻覆此瓠壺三年一夢乃復見余今余南遷亦
已三年矣自城西僑舍纔移城南而長兒挈家

來會事適與坡翁相符不可不志漫述一詩示
兒

坡翁謫惠州有子挈家至三年乃復見欣然詩以志
自我竄海瀕青楓三鑽燧骨肉隔殊方思之邈難致
爾今來覲我千里攜諸稚垂髻儼環珥繞膝爭嬉戲
別來見存沒歡極却垂淚杜陵實先獲相對如夢寐
棲遑焉暇論賴爾且慰意依然白鶴峰異代事相類
浮生處世間誰免十口累向來流放人子然多孤寄
妻孥幸團欒我獨受厚賜於身亦已足餘外可撥置
次兒輩暮登城上用柳州韻

露草蕭蕭古堞荒平蕪暝色入微茫遙看海氣霾村
樹却憶宮雲覆苑墻繞郭寒山供拄頰經秋苦竹攪
愁腸高高獨有中天月不隔秦城與楚鄉

同福趙使君雲老

景望

來訪有詩追寄次韻以

謝

握手仍忻悵歸驂不可留俱為異鄉客更覺此生浮
旅鴈傳秋信寒蟲吊別愁華山千里夢今夜共悠悠
久聞同福赤壁頗有勝槩無由致身其間以續
坡仙之遊漫吟一絕寄興仍奉雲老使君要和
水落山高赤壁秋福川何似舊黃州騷人不及橫江

鶴飛度臨臯十月舟

送協緝二兒還京後無聊口占

秋盡荒城獨掩扉敗蘭衰菊映斜暉賓鴻就暖皆南
逝遊子衝寒又北歸橋外暮山圍古驛馬前霜葉打
征衣登高且莫頻回首天際孤雲漫自飛

敬次仲氏寄示韻夜坐書懷

亭亭片月掛城頭倚杖虛簷看斗牛何處驚飛秋後
鴈海天孤影夜深流

其二

光陰衮衮水同流歲暮羈心更百憂湖海只今為淨

界不妨身世伴沙鷗

次彝仲和弼卿寄示之韻

明時遠逐竟誰憐萬事驚心雪滿顛
新貴任從聲勢長舊交猶有夢魂牽
雲收動石山街月地盡臨瀛海
拍天玉玦銅符俱外物浮生南北且隨緣

動石在月出山

雪夜醉起步月

客去閉柴門風篁響飛雪中宵酒初醒
散步空庭月

趙君景昌自湖西到同福與其兄子正萬來訪

臨別書贈

雪擁柴門車馬稀荷君相訪到天涯
青燈竹屋三更

話把酒依然嶽麓時

口占贈趙正萬以寓勉學之意

赤壁秋堪賞仙樓夜可憑何如竹裏館
靜對讀書燈

挾仙樓在同福

丁巳除夕用李白紫極宮韻寓感兼以自警

歲律忽焉窮荒城聞爆竹流光如掣電
閃爍不堪掬家家惜此宵苦心惟我獨
頽頽對殘燈耿耿未能宿五十愧無聞
餘生固已卜吾人貴自疆皓天豈不復
寡過在知非斯言尚可覆勉勉惜分陰
羊胛幾回熟

次尤齋至日見寄韻

戊午

微陽發處鏡開函漸覺昭蘇萬品咸莫道柔陰還易
制到頭人慾極巉巖

感懷又用前韻寄呈

淚濕天書鎖滿函楚江羈影吊彭咸鹽梅舟楫渾如
夢物色空餘舊築巖

瑞石山元曉菴老僧永閒委來相訪呈七言律
三首走次其一以贈

楚江春晚日如年逐客羈棲任靜便門掩古城寒食
雨夢回空院杏花天都將禍福拋身外却怕塵喧到
耳邊忽有老僧勤遠訪清詩一讀意悠然

能弟南來見余留十日而歸臨別不堪悵黯口

占書贈

朗州去京國山海隔千里非爲老兄謫爾行何到此
別來如昨日寒暑四回換生者尚再見逝者何當返
哀情與歡意欲言淚先落團圓未渠央告歸還局促
爾馬不可繫我車誰載脂黯然越江別千載同此悲
青春北山下花萼昔相輝風吹辭故枝飄泊失因依
相彼在原鳥齊飛共和鳴吾人獨何事邈若參與商
三復小宛詩惻愴各吞聲月征且日邁庶無忝所生
別能弟口號

孤城風雨杏花飛節過清明送獨歸最是老松荒草
感涪南心事益沾衣

山谷謫中送弟詩云明月灣南
松老大永思堂下草荒涼指其
先權所
在也

暮春

草長江南三月時雜花飛盡柳絲垂佳辰舊俗青楓
火騷客新居白竹籬秦塞送回鴻鴈陣楚山留伴鷓
鴣枝炎風朔雪皆王土且喜春光入我詩

春夜

暗風吹雨入窻斜孤夢初回天一涯却恠疎簾映殘
雪夜深庭院有梨花

春望

花外層城柳外樓夕陽吟望更悠悠春來一種江潭
草獨有藤蕪管客愁

慎上舍聖尹求題二友堂次韻寄贈

高門積慶啓方來二友名堂歲幾回苦節清芬元世
業芙蓉池畔竹林開

二友堂即慎家舊屋以
其有竹蓮故名之云

為朴君世卿次高霽峰贈其曾祖朴壽翁韻

萬頃清波沒白鷗壽翁遺跡幾回秋淒涼三島無人
管瑤草年年綠自抽

其二

文名集
荷衣終不換朱輪尚想山冠岸白綸休道典刑今已
遠岫雲江月是傳神

其三

山形長似老仙臞水色澄澄鑑髮鬚此是當年吟嘯
地古槐疎柳自相扶

其四

海上蟠桃幾遍紅西湖風月畫圖中丹爐橘井渾如
舊鄉里千秋說壽翁

其五

千歲靈龜十丈蓮吸風含露共澄鮮超然不受泥塵

澗何限人間蟻慕膻

哭姊兄李錦山

重輝

公來入吾門四十一寒暄何處始逢公蟾江江上村
公顏花映肉我馬驟其竹童駭幸見憐鴈行忝追逐
念我早喪恃伶俜依外氏誰無兄弟懷我獨賴我姊
我姊柔嘉質令問宜家室既喜配佳耦且喜歸名闕
誰誰琴瑟友猗猗芝蘭秀奈何借老約中道成大謬
存亡二十年宰樹已蒼然餘生亦孤露吊影腸內煎
感公偏眷顧情好不替故公年近周甲我髮颯垂素
相看各老大別多常少會世味覺漸闕世事付無奈

我佩蠻鄉玦公投錦溪綬一爲參與辰音塵便間濶
沈疴佇快痊幽問驚遠傳胡爲邈殊方復此隔重泉
嗟公信忠厚叔世那更有天旣嗇各位庶餉期願壽
奄忽而至斯斯理益難推延津劍有神離合本前期
同歸萬古宅不減平生樂人間藐諸孤子子將安託
秋雲廣陵麓夜月壽洞屋舊遊森眼前撫事摠陳跡
無由挽素轄忍想玄扃閉哀歌寄楚些淚盡湘江漉
彛仲使君遺竹可且寄一律用其韻謝之

休誇斲篔簹擅瓌竒清玩文房此最宜磋切却與淇澳
詠摩挲偏愛雪霜姿來從瑞石鳴琴地坐對湘潭惜

誦時酬贈愧無青玉案歲寒心契且追隨

原韻

竹之爲用儘清竒親近無如几案宜渾削楚斑呈
素質巧編淇菴粲幽姿行添六一歸田簿要伴三
餘展卷時今日贈公供拂拭紙窗燈火好相隨

瑞峰寺僧萬勳來訪自言性聰徒弟投以一律
一絕走次其絕句以贈

平生逸想在禪家未踏名山鬢已華安得一筇隨爾
去瑞峰明月臥金沙

萬勳沙彌自玄乞句甚懇口號以贈

文集
聰師門下見勲師更有沙彌骨格奇與我今成三世
好憐渠肯惜一篇詩

南生有昌將往蓬山謁尤齋次其前日呈尤齋

韻贈別

連年重繭趨函丈不道囚山瘴海悠看取程門邢郭
輩喜君風誼出凡流

其二

臨水登山楚國秋送君東去思悠悠天教易傳書終
就莫歎涪陵四載留

伊川謫居涪州四年故云

又用秋字韻寄呈尤齋

東海南溟接素秋寸心如水日悠悠楓林關塞無消
息夢罷空梁落月留

淳昌鮎巖村卽河西先生之武夷也先生後孫
金君時瑞結茅就居以繼先志余喜其不忝堂
構用其見寄韻賦寄兼寓勉勵之意

魚巖藤洞舊林丘聞說賢孫復釣遊沂上春風庭畔

草好將心法繼箕裘

黃蘗洞在鮎巖先生嘗教學者體認浴沂庭草意思故及之

中秋夜感懷

楚天明月又中秋添却孤臣一段愁正想秦城當北
斗獨憐燕鴈到南州園陵白露悲金粟禁苑輕寒

戀玉樓惆悵素華難可攬夜深無數亂雲浮是夜雲陰蔽月

次韻贈柳君燁然

傾盖偶成萍水會窮途方見歲寒心他時結網窩中

夢能記枕椰烟雨林柳家在錦水上踰其居曰結網窩云

故統制使柳公珩為平安兵使時延陽李相公

時白以書生讀書于香山柳公嘗寄一絕柳公

之孫斐然為兵使以其詩刻以揭之寺壁今柳

君燁然又求余次其韻口占以贈

六十年間一夢如香爐秋月幾盈虛詩傳細柳曾橫

槩名記匡山舊讀書延陽公題名尚在寺中云

鳴陽星山洞有棲霞堂息影亭石川林公嘗居

之水石池臺之勝具見石川諸詩與松江鄭相

公星山別曲一時諸賢無不往來吟眺其風流

盛事今猶可想已蕪廢百餘年無復舊觀鄭君

涖松江相公之孫也居在一洞嘗慨然於斯遂

就舊墟披荆蠲疏改拓其池至一尋則有蓮根

蟠土中不死亦異哉鄭君紀其事兼賦二絕見

示余素慕石川風致且嘉鄭君之志次其韻却

寄

空洲芳草綠年年不見荷衣舊謫仙金骨只今應化

鶴月明飛影下江天

星山洞舊有芳草
洲石川一號荷衣

其二

荒池白露為誰秋地底蓮根寂寞留封植不忘嘉樹
傳喜君能繼舊風流

哭李尚書長卿

聖祖初御極羣才競勵翼我忝預宮選君射明廷策
聯翩上雲衢接武趨文石周旋繡豸班密邇銅龍席
銀臺咫尺天忍說攀髯夕百年共舍恩萬事終非昔
空餘滿襟血灑向 寧陵栢

其二

煌煌月沙翁華夏誦其名文章即青氈三世仍提衡
丹穴摠竒毛箇箇難弟兄君才最出倫擲地振金聲
爭期紹家業牛耳主齊盟惜哉時命乖流俗喜相輕
篋中千首詩漫輸騷人評

其三

東湖麟鳳洲上有蓬萊院翺翔盡仙侶恩暇推高選
懸燈竹房幽泛月蘭舟轉催成蓮燭詩共飽天厨膳
酒興更文會新堂詠賀燕盛事那再得陳跡一轉眄
千秋江漢水不隨人世變

其四

文谷集
昔我使北關弭節鶴城路君時作遨頭把臂欣相遇
哀絃間清唱舟下龍堂渡重期沛館會酒賦極歡趣
橋臨萬歲遙亭倚北山暮舊遊恍春夢浮生劇朝露
傷心柳梢青誰復續佳句

其五

與君三世交交誼久彌敦君家羣從行視我如弟昆
追隨共襟期會晤窮朝昏聯酬謝池句對酌秦樓樽
居然十年間零落無復存可憐一鶴鴿孤鳴悲在原
山陽千古感淚盡洛東村

其六

飄飄洞庭葉風雨俱失所我竄南海壩君臥東郊墅
天末各晨星朝端無舊侶聞君到鵲橋邈若銀河阻
詩筒替驛梅聊以慰延佇遺篇尚在篋撫跡今如許
依然屋梁月照我夢回處

其七

八座亦云崇六旬不爲夭所悲舊交盡所惜人才眇
英姿與雅韻已矣都輸了一別隔死生大暮那復曉
嘉陵秋草路想見飛丹旒嶺海渺千里何由哭新垞
欲寄薤露詞增我哀腸繞

寄題曹丈敬璨安用堂

鳩林勝槩擅南隅別有閒人樂事俱檻外晴雲來月
嶽門前春水散西湖舟回竹島魚登網碁罷梅窗酒
滿壺天放似君誰不羨白頭遷客愧迷塗

月出之南支有所謂觀音臺石勢甚巉絕臺上
有舊屋基其廢不知幾百年山人時習結菴三
間以居之其堅苦可尚也習屢踵門求余記其
事余既許之而病懶久未副欲一訪其勝而亦
未暇也習適以其師詩卷見示聊用卷中韻賦
二絕以塞其勤

山如削立石如飛千仞臺高可振衣遷客病來休杖

屨夕陽空送片雲歸

其二

孤菴寄在翠微間架石梯雲不作難見說夜深竒絕
處西湖烟月畫中看

次韻寄題鄭叅奉時高寄旅軒

釣水盤中宅耕巖谷口廬桑麻分巷陌松菊護階除
寄世知身幻關門任客疎萊衣弄雛地此樂不求餘

鄭君所居地名盤谷

玄上舍徵竹林亭十詠

開窻面月出東嶺最相當坐覺水輪上清輝已映床

右東嶺霽月

鬱鬱虬龍幹長風吹作濤
條然滿清聽不羨茅山陶

右北亭長松

春來耕白水秋至割黃雲
苦樂田家事農謳隔岸聞

右南畝農謳

村居湖水上一半是漁家
知有夜船返時聞風外歌

右西湖漁歌

花開遍村巷不獨滿園紅
歲歲春多少都輸杖屨中

右後園賞春

積雨前溪漲羣流爭一門
狂瀾無計遏長嘯倚風軒

右前川觀漲

石骨聳孤青秋霜染萬葉
粧成錦繡屏故向亭前匝

右九井霜楓

西湖無限景獨愛孤山雪
更著水邊梅黃昏映斜月

右孤山雪梅

精舍隱何許洞門深復深
認得炊時早孤烟忽起林

右聖洞朝烟

落景照前山遙看圖畫間
歸僧與棲鳥爭似主人閒

右鷓峰夕照

口號留別朴上舍世卿用其韻

秋晚荒城欲別時別懷僚慄不成詩重陽未到嚴程
急孤負龍山落帽期

留別曹文敬璨兼示鳩林諸人

四年蘭佩瘴江濱月出千峰相對親今日北歸回首
望峴山真似故鄉人

留贈林族益瑞

臨歧摻袂暫踟躕各問前期定有無他夜北寬亭畔
月夢隨秋鴈到西湖

南來四載足不出門外烟村祠院在咫尺而未
展一謁然其瞻仰則多矣今當北遷口占一絕

示崔君宣錫保錫昆季以道其區區兼示院中
諸章甫崔君卽烟村後孫也

卓識清風疏傅儔高名長與月山留迷塗有客悲窮
轍瞻仰遺祠更一羞

留寄慎上舍聖尹

素隱風流已返仙南來喜遇阿咸賢那堪二友堂前
路苦竹殘荷別恨牽

素隱卽慎公天翊號
上舍卽其從姪也

仙巖驛口號書扇贈光牧李彝仲

落日仙巖驛歸雲瑞石山相逢又相別惆悵路歧間

次韻

彝仲

相逢無別語共說白雲山早晚誅茅計從遊在此
間

醉草贈李弟汝相

古驛三杯酒秋天九月雷臨分無限意欲去更遲徊
是日雷雨

冒雨暮投井邑

荻嶺千層杳靄間短蓑羸馬困躋攀如何逐客西歸
路苦竹霜楓又楚山井邑舊號楚山

泰仁次主守李君鳳朝用李彝仲披香亭韻贈
別之作

寒塘秋望夕陽中零落殘荷倒晚風騷客自憐來苦
緩倚欄空詠滿江紅

敬次披香亭先祖題詠韻

秋池白露幾回溥泣閱紗籠獨倚欄七十八年多少
感敗荷依舊雨聲寒

其二

羈人北去鴈南飛九月湖城雨滿衣高閣晚來成遠
眺亂山如畫映斜暉

泰仁遇徐君鳳翎用其前日見寄韻書贈

蕭疎風韻澹靈臺誰識斯人在草萊此去清詩攜滿

袖隴頭遙替一枝梅

泰仁逢金君道器感懷書贈

苔湖直節更清詩每喜傳家有白眉荆樹一時零落

盡舊交空對惠連悲苔湖即金公地粹號有二子良器又器一時淪逝故云金即苔

湖之姪也

石橋金君又器操行過人余心常嚮往不專以

世好也不幸蹉跌不一面而遂成千古今北歸

之路去其舊廬甚邇一倍愴悼其從弟金君道

器來別於詩山語及夢中石橋公報余行期之

事相對一涕賦一絕以示

一而嗟相失重泉奈永違聞君話幽夢歸路益沾衣

贈南生有昌將往蓬山

感子殷勤意羸驂送我還遙遙別後夢相逐到蓬山

觀津道中

清曉客行早高秋風色淒稻畦霜後鴈茅店霧中雞

萍梗何嘗定津塗久已迷山前有石佛應復笑棲棲

次宋甥相琦贈別韻

好事公山雨天教遠客留那堪團會地旋作別離愁

路出滄江曉城寒落木秋飛沈元有數不用淚長流

素沙感舊

宿昔溫泉幸叨陪 鑿輅迴軍容明組練帳殿倚崔嵬
此路今重過餘生只獨哀蒼梧秋色裏掩淚向蒿萊

過芝洞感懷書示李君喜朝

嶺海吾猶返泉臺何日期山陽十年淚灑盡靜觀池
梁門途中憶白雲山庄

駐馬山橋眼忽開清溪知自白雲來仙源咫尺無由
到悵望千峰紫翠堆

到東州

南國魚蝦侶東州麋鹿羣優游山海內隨處揔 君

恩

伯氏仲氏相繼來會於東州服舍窮寂之中慰
懷多矣臨別不堪悵黯口占錄呈

自從二人懷但有兄弟隨此懷卽今日感嘆先祖詩
四載竄南徼參商各天涯迢迢華岳麓渺渺漢湖陂
陟岡幾瞻望看雲勞夢思音徽邈以疎日夕抱調飢
天恩寬逐臣鞮屨許內移鴿原幸不遐東峽接王畿
念之便相就宿春策黎眉翻思瘴海隔不道山蹊巖
姜叟共一堂迭唱墳與麓冬夜豈不長秉燭各忘疲
笑言無倦聽湛樂何怡怡恍然如夢寐歡極轉生悲

悲哉泉下別一去何時歸同氣半喪亡餘生亦已衰
骨肉貴安集功名有成虧蘇家聽雨約耿耿至今違
雖成對床眠奈此故鄉非何山無樂土世網動牽羈
緬羨大小何一丘同棲遲臨分更百感執手徒增歎
願言奉先訓勿替歲寒期

口占贈族姪歛谷守盛最

東州此會何曾料却憶南鄉送爾迴安得海天無限
月一樽同醉侍中臺

侍中臺在歛谷

東州即事

東州荒峽裏遷客定新居野濶弓王國山回麗祖墟

人烟村巷冷雪月戶庭虛寂寂生涯事殘燈一架書

日暮蒼山天寒白屋分韻得日字

鐵峽近北關窮冬轉蕭瑟凜振山岡野雪深沒膝
寒谷積陰凝誰歎吹暖律幽人似蝨蟲墜戶守一室
端居謝輪蹄靜味寓書帙烹茶敲井冰炙背就簷日
何必氈毼然後禦寒栗

次朴都事徵之

泰徵

詠雪見示韻

響多知灑急寒重覺堆深幻出瓊瑤界粧成薜蘿林
幽期曠何許清興浩難禁忽枉新詩贈巡簷爲一吟

春帖

天地三陽泰邦家屢歲豐畸人無事業黃卷驗新功

其二

溪水初褪凍簷日欲舒暄雪裏東州菜春盤亦 聖
恩

別李郎

十五如初日東床玉雪郎乘龍占喜氣執鴈見清揚
少別猶紆軫孤征勉護將歸來及春早文史好商量

除夜次唐詩韻

旅枕伴殘燭寥寥誰與親東州今夜客南國去年人
閱盡無窮事依然見在身坐看兒女戲空復憶青春

文谷集卷之四

Blank lined writing area with vertical columns.

